

**Najib Tidak Mahu 1Malaysia Jadi Slogan Atau Retorik Politik  
Bernama  
14 Julai, 2012**

HULU LANGAT, 14 Julai (Bernama) -- Datuk Seri Najib Tun Razak tidak mahu gagasan 1Malaysia tinggal sebagai slogan atau retorik politik semata-mata, sebaliknya mahu ia diterjemahkan kepada sesuatu yang boleh dikecapi dan dinikmati oleh rakyat.

Perdana Menteri berkata dalam merealisasikan usaha itu, lebih banyak perkhidmatan dan produk bersandarkan 1Malaysia perlu diperkenalkan bagi membantu meringan beban kehidupan yang dihadapi rakyat pada masa kini.

"Apabila diperkenalkan perkhidmatan dan produk 1Malaysia, senarainya tiada 'noktah' cuma ada 'koma' ... tiada akhir. Namun, kita tidak sewenang-wenangnya membenarkan 'branding' 1Malaysia ini digunakan.

"Ramai yang memohon, ada yang saya setuju, ada yang tidak setuju. Apa yang penting perkhidmatan dan produk 1Malaysia mampu membantu rakyat," katanya ketika berucap merasmikan Kedai Kain Rakyat 1 Malaysia (KKR1M) di sini, hari ini.

Turut hadir pada perasmian kedai itu di No 1, Jalan Lagenda Suria, Taman Lagenda Suria di sini ialah Menteri Perdagangan Dalam Negeri, Koperasi dan Kepenggunaan Datuk Seri Ismail Sabri Yaakob dan Menteri Pertanian dan Industri Asas Tani Datuk Noh Omar.

Pada 8 Julai lepas, semasa berucap di program Janji Ditepati di Bandar Baru Bangi, Najib mengumumkan penubuhan kedai itu sebagai satu daripada inisiatif kerajaan Barisan Nasional (BN) dalam membantu meringankan beban rakyat.

Najib berkata pengenalan Kedai Rakyat 1Malaysia (KR1M) juga mendapat sambutan menggalakkan apabila berjaya mencatat penjualan memberangsangkan.

Selain itu, Najib yang juga Menteri Kewangan, berkata perkhidmatan 1Malaysia sememangnya membantu meringankan beban rakyat terutama golongan berpendapatan rendah ialah Klinik Rakyat 1Malaysia kerana menawarkan perkhidmatan yang murah dan berkualiti.

"Kalau pergi ke klinik swasta sekurang-kurangnya perlukan RM30, itu belum termasuk tambang teksi atau bas. Tapi kalau pergi Klinik 1Malaysia hanya bayar RM1 dan akan dapat perkhidmatan kesihatan.

"Kita juga ada Menu Rakyat 1Malaysia dengan bayaran sarapan pagi RM2 dan dengan RM4 untuk makan tengah hari kita dapat sajian yang lazat serta cukup zat dan nutrisi," katanya.

Selain itu, kerajaan juga mempunyai program Perumahan Rakyat 1Malaysia (PR1MA) untuk meningkatkan akses golongan berpendapatan sederhana memiliki rumah serta Program Teksi Rakyat 1Malaysia (TR1MA) yang antara lain bertujuan meningkatkan mutu perkhidmatan pengangkutan awam negara.

Najib berkata KKR1M menjual pelbagai jenis kain dan pakaian yang berkualiti tinggi dengan harga yang lebih murah daripada harga pasaran.

"Saya sahkan, terbukti harga pakaian dan kain (di KKR1M) jauh lebih murah daripada harga

pasaran. Kementerian (Perdagangan Dalam Negeri, Koperasi dan Kepenggunaan) ambil masa semak harga semua produk," katanya.

Beliau berkata antaranya kain batik jacquard yang dijual dengan harga RM15 berbanding RM35 sepasang di pasaran, baju kemeja linen sehelai RM45 berbanding RM79 di pasaran serta kain satin RM40 sepasang berbanding RM50 di pasaran.

Selain keperluan pakaian, kedai itu turut menawarkan barangan lain seperti langsir, kelengkapan sekolah dan kelengkapan bersolat seperti sejadah dan songkok.

Najib berkata 30 lagi KKR1M akan dibuka seluruh negara dalam tempoh dua tahun ini.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=680590>